

Bosna i Hercegovina

Federacija Bosne i Hercegovine

TUZLANSKI KANTON

KANTONALNI SUD U TUZLI

Broj: 003-0-Su-21-000 105

Datum, 16. juli 2021. godine

**STATISTIČKI IZVJEŠTAJ O POŠTIVANJU OPTIMALNIH I PREDVIDIVIH ROKOVA
U PERIODU OD 01.01.2021. GODINE DO 30.06.2021. GODINE**

U skladu sa članom 15. stav 1. Pravilnika o vremenskim okvirima za postupanje po predmetima u sudovima i tužilaštvima u Bosni i Hercegovini, a shodno Odluci o predvidivim rokovima Kantonalnog suda u Tuzli, dostavljamo Vam statistički izvještaj o poštivanju optimalnih i predvidivih rokova za prvih šest mjeseci 2021. godine.

Analiza pokazatelja iz statističkog izvještaja o poštivanju optimalnih i predvidivih rokova:

Statistički izvještaj o poštivanju optimalnih i predvidivih rokova iz CMS-a dostavlja se u prilogu obzirom da je isti u pdv formatu.

Analizom navedenih pokazatelja konstatovano je da je do prekoračenja predvidivih rokova došlo na referatima koji imaju najveći broj neriješenih predmeta i na kojima su sudije zadužene velikim brojem neriješenih predmeta koje ne mogu iz objektivnih razloga staviti u rad. U Kantonalnom sudu u Tuzli na početku izvještajnog perioda tj. sa 01.01.2021. godine na svim referatima bilo je ukupno neriješenih 5.538 predmeta. U izvještajnom periodu, za prvih 6 mjeseci primljeno je na svim referatima 1.945 predmeta, tako da je ukupno u radu bilo 7.483 predmeta, što znači da su sve sudije u ovom periodu bile radno angažovane svaki bi sudija u prosjeku bio zadužen sa 288 predmeta. Međutim, zbog dugotrajnog postupka izbora novih sudija, a također i zbog odsustva nekih sudija usljed bolovanja, broj neriješenih predmeta nije se smanjio onako kako smo planirali. U prvih šest mjeseci 2021. godine na svim referatima riješeno 2.292 predmeta i od tog broja do prekoračenja predvidivog roka došlo je u 889 predmeta i to u 585 drugostepenih parničnih predmeta, u 76 drugostepenih predmeta o žalbi „Dn“, u 67 predmeta upravnog spora, u 59 predmeta privrednog spora, u 34 predmeta po žalbi u krivičnom postupku, u 44 drugostepena prekršajna predmeta i do neznatnog prekoračenja u predmetima upisa registracije privrednih subjekata (5), u predmetima po žalbi u vanparničnom postupku (5), u predmetima ponavljanja parničnog postupka (5) i u ostalim vrstama sporova u trajanju od jednog dana.

Najveće prekoračenje predvidivog roka, kao i u prethodnim godinama došlo je u građanskim predmetima, a radi se o 585 parničnih predmeta. Do ovog prekoračenja došlo je zbog velikog opterećenja sudija koji su zaduženi sa velikim brojem neriješenih predmeta i svaki sudija na građanskom referatu zadužen je u prosjeku sa oko 360 predmeta, što predstavlja skoro dvogodišnju normu sudije na ovom referatu, bez priliva novih predmeta i objektivno zbog velikog broja predmeta ne mogu se ispoštovati predvidivi rokovi. Na ovom referatu sa 30.06.2021. godine radilo je 16 sudija,

s tim što je jedan novi sudija započeo sa radom 01. marta 2021. godine, a jedan od sudija koji je radio na građanskom referatu otišao je u penziju sa 01.03.2021. godine.

Na ovom referatu očekujemo u mjesecu avgustu početak rada novoizabranog sudije, koji će primiti referat sudije koji je imenovan za sudiju u Kantonalni sud u Sarajevo od 16.08.2021. godine. Prema tome, na ovom referatu bez obzira na izbor novog sudije, ostat će isti broj sudija koji će raditi na predmetima.

Na prvostepenom krivičnom referatu došlo je do prekoračenja predvidivog roka u 4 predmeta, jer se radi o predmetima koji su složeni i u kojima krivični postupak zbog složenog dokaznog postupka traje duži vremenski period. Sem toga, s obzirom na epidemiološke mjere koje su bile na snazi u ovom periodu zbog Coronavirusa, bilo je teško organizovati suđenja i prisustvo stranaka suđenjima, a također i svjedoka, što se sve nepovoljno odrazilo na okončanje predmeta. U jednom broju ovih krivičnih predmeta, predmeti se zbog procesnih razloga ne mogu staviti u rad, jer su optužena lica nedostupna i protiv njih su raspisane potjernice. Prije svega radi se o predmetima ratnih zločina koji su zbog nedostupnosti optuženih lica blokirani i ne mogu se raditi.

Na drugostepenom krivičnom referatu došlo je do prekoračenja predvidivog roka u 34 predmeta, jer se predmeti uzimaju u rad prema starosti inicijalnog akta i prema fazi koja je otvorena kod ovog suda, a obzirom da svaki sudija na drugostepenom krivičnom referatu ima oko 80 neriješenih predmeta, objektivno sudije nisu mogle uzeti sve predmete u rad zbog čega je došlo do prekoračenja predvidivog roka. Sem toga, zbog Coronavirusa dvoje sudija sa drugostepenog krivičnog referata bilo je na dužem bolovanju. Od ukupno riješenih 302 predmeta na ovom referatu sa prekoračenjem predvidivog roka riješeno je 34 predmeta.

Na drugostepenom prekršajnom referatu sa prekoračenjem predvidivog roka riješeno je 44 predmeta od ukupno završenih 152 predmeta. Ovo iz razloga što drugostepene prekršajne predmete radi samo jedan sudija koji je zadužen i prvostepenim krivičnim predmetima „K“, jer se drugi sudija koji je radio također ove predmete, nalazi na bolovanju od 01.02.2021. godine i dalje, tako da je neizvjesno kada će se vratiti sa bolovanja.

U ostalim vrstama sporova i to postupak upisa u registar poslovnih subjekata, postupak po žalbi u stečajnom postupku i po vanrednim pravnim lijekovima u sasvim neznatnom broju predmeta došlo je do prekoračenja predvidivog roka od ukupnog broja riješenih predmeta na tim referatima.

Broj neriješenih predmeta na kraju izvještajnog perioda je 5.191 predmet, što znači da se za 347 predmeta smanjio broj u odnosu na početak godine, ali ovaj broj bi bio znatno veći da je imenovan još jedan stalni sudija na početku godine, da jedan sudija nije otišao u penziju dana 01.03.2021. godine i da 5 sudija nije obolilo od Corone, a da jedan nije otišao na dugotrajno bolovanje zbog teške bolesti. Prosječno trajanje riješenih predmeta iznosi 592 dana, a prosječno trajanje neriješenih predmeta iznosi 528 dana.

Problem predvidivih rokova ne bi bio toliko izražen da sudije rade samo zaostale neriješene predmete koji su određeni Odlukom o predvidivim rokovima sa danom 01. januar 2021. godine, ali problem postoji jer se predmeti u ovom sudu rješavaju prema Planu rješavanja predmeta, te ukoliko je predmet star i došao na rješavanje po žalbi u ovaj sud, uzima se odmah u rad, pa stoga postoji nesklad između Plana rješavanja predmeta i Odluke o predvidivim rokovima prema kojoj se predmeti trebaju uzimati u rad prema starosti inicijalnog akta kojim je pokrenut postupak pred ovim sudom.

Analiza raspoloživih resursa u sudu:

Kantonalni sud u Tuzli pokriva područje 8 općinskih sudova i postoji nesrazmjer između postojećeg broja sudija Kantonalnog suda u Tuzli i sudija i stručnih saradnika koje je izabralo Visoko sudsko i tužilačko vijeće BiH, a koji rade u općinskim sudovima na području Tuzlanskog kantona, a koji problem smo isticali i u prethodnim godinama. Ovaj nesrazmjer nije ni do danas izbalansiran, tako da postojeći broj sudija, obzirom da su zaduženi velikim brojem neriješenih predmeta, ne mogu rješavati sve predmete u predvidivim rokovima. Trenutno u Kantonalnom sudu u Tuzli radi 25 stalnih sudija, uključujući i predsjednika suda i 1 dodatni sudija, iako bi trebalo raditi još 7 stalnih sudija, za koje pozicije su obezbjeđena sredstva za jednog sudiju koji je otišao u penziju, dok za 6 stalnih pozicija nisu obezbjeđena sredstva.

Za potrebe Kantonalnog suda u Tuzli od mjeseca januara 2021. godine rade i sudije Kantonalnog suda u Odžaku, jer taj sud nema dovoljan broj predmeta za rad i angažman ovih sudija će trajati do mjeseca januara 2022. godine, nakon čega se nadamo da će Visoko sudsko i tužilačko vijeće BiH produžiti i dalje njihov angažman, jer ove sudije u periodu od godinu dana urade značajan broj predmeta. I u 2021. godini u ovom sudu je izražen problem nedostatka administrativno – tehničkog osoblja (daktilografa) koje bi bile u funkciji podrške rada sudija, jer obim posla koji se povećao radom na CMS-u i konstantno povećava, zahtijeva da svaki sudija ima svog saradnika – daktilografa, a što zahtijeva i dodatna sredstva u budžetu. Posebno naglašavamo, da su sve sudije maksimalno angažovane na svojim referatima, te da u skladu sa donesenim Planom rješavanja predmeta rade stare predmete i dosljedno se pridržavaju tog plana, kao i Plana rješavanja stečajnih predmeta i predmeta proizašlih iz stečajnih postupaka.

Analiza „perioda neaktivnosti“ u predmetima:


U ovom izvještajnom periodu u Kantonalnom sudu u Tuzli je na snazi Plan rješavanja predmeta, te se u skladu s tim Planom sačinjavaju kvartalni planovi i predmeti dodjeljuju sudijama u rad prema starosti inicijalnog akta kojim je pokrenut postupak pred općinskim sudom i prema starosti faze kojom je predmet zaveden kod ovog suda. Također je na snazi Plan rješavanja stečajnih predmeta i predmeta proizašlih iz stečajnih postupaka i ovi predmeti kao hitni po zakonu prioritetno se uzimaju u rad. Predmeti u sudu su ravnomjerno raspoređeni na sve sudije, tako da su u pogledu ukupnog broja predmeta sudije ravnomjerno opterećene. U nekim prvostepenim krivičnim predmetima zbog raspisanih potjernica protiv optuženih lica, predmeti su neaktivni i ne mogu se raditi, tako da su u CMS ti predmeti određeni kao nerješivi. Na građanskom referatu, referatu upravnog spora i drugostepenom krivičnom referatu, postoji opravdana neaktivnost rada na predmetima, jer sudije objektivno zbog velikog broja zaduženih predmeta i pritvorskih predmeta, ne mogu predmete uzeti u rad, jer 85% mjesečne norme isključivo rade stare predmete, a preostali dio norme od 15% pritvorske predmete, predmete nasilja u porodici, predmete stečaja, kao i ostale predmete po zakonu hitne prirode.

Prijedlog mjera kako bi se utvrđeni predvidivi rokovi skraćivali i približavali optimalnim rokovima:

- Potrebno je u Kantonalnom sudu u Tuzli do kraja 2021. godine izvršiti popunjavanje sistematizacije suda sa sudijama koji nedostaju, kao i onim sudijama koji će otići u penziju, odnosno njihov izbor potrebno je da izvrši Visoko sudsko i tužilačko vijeće BiH, jer period koliko će trajati procedura oko njihovog imenovanja ovaj sud će uskratiti za značajan broj riješenih parničnih i krivičnih predmeta. Bez imenovanja novih sudija ne mogu se značajno

poboljšati rezultati u pogledu broja riješenih predmeta, iako se iz izvještaja vidi da su rezultati bolji nego u prethodnom periodu. Potrebno je obezbijediti sredstva za izbor stalnih sudija koji nedostaju po sistematizaciji, a radi se o 6 stalnih sudija, kao i sredstva za prijem većeg broja administrativno – tehničkog osoblja, jer je ovo veliki sud, sa velikim brojem predmeta, a nedovoljnim brojem kadrovskog osoblja koje bi radilo na tim predmetima i bilo podrška radu sudija. Zahtjev za obezbjeđenje sredstava prema Ministarstvu pravosuđa i uprave Tuzlanskog kantona, sud je uputio u ovoj godini.

- Visoko sudsko i tužilačko vijeće BiH treba skratiti rokove provođenja procedure izbora sudija, a pogotovo u sudove koji imaju veći broj neriješenih predmeta.
- Visoko sudsko i tužilačko vijeće BiH kada postoji mogućnost u skladu sa zakonom, treba koristiti institut delegacije sudija iz sudova koji su ažurni u sudove koji imaju veliki broj neriješenih predmeta, kao što je to i učinjeno sa delegiranjem sudija iz Kantonalnog suda u Odžaku u Kantonalni sud u Tuzli.



PREDSJEDNIK SUDA

Indira Radošević